

## Y PWYLLGOR GWAITH

### Cofnodion y cyfarfod rhithwir a gynhaliwyd ar 18 Ionawr, 2021

<b>PRESENNOL:</b>	Y Cynghorydd Llinos Medi (Cadeirydd) Y Cynghorydd Ieuan Williams (Is-gadeirydd)  Y Cynghorwyr Richard Dew, Carwyn Jones, R. Meirion Jones, Alun Mummery, R.G. Parry, OBE FRAGS, Dafydd Rhys Thomas, Robin Williams
<b>WRTH LAW:</b>	Prif Weithredwr Cyfarwyddwr Swyddogaeth (Adnoddau) a Swyddog Adran 151 Cyfarwyddwr Swyddogaeth (Busnes y Cyngor)/Swyddog Monitro Cyfarwyddwr Addysg, Sgiliau a Phobl Ifanc Cyfarwyddwr Gwasanaethau Cymdeithasol Dros Dro Pennaeth Proffesiwn (AD) a Thrawsnewid Pennaeth Gwasanaethau Tai Pennaeth Gwasanaethau Democraidaidd Swyddog Pwyllgor (ATH)
<b>YMDDIHEURIADAU:</b>	Mrs Annwen Morgan (Prif Weithredwr)
<b>HEFYD YN BRESENNOL:</b>	Y Cynghorwyr Glyn Haynes, Kenneth Hughes, Trefor Lloyd Hughes, MBE, Aled Morris Jones, R. Llewelyn Jones, Bryan Owen, Dylan Rees, Dafydd Roberts, Swyddog Cyfathrebu (GJ), Mr Gareth Wyn Williams (Gohebydd Democratiaeth Lleol))

---

Estynnodd y Cadeirydd groeso cynnes i bawb a oedd yn bresennol yn y cyfarfod rhithwir hwn o'r Pwyllgor Gwaith.

#### 1. DATGAN DIDDORDEB

Bu i'r Cynghorydd Richard Dew ddatgan diddordeb sy'n rhagfarnu o ran eitem 6 ar yr agenda ac nid oedd yn bresennol pan drafodwyd y mater.

Bu i'r Cynghorydd Ieuan Williams ddatgan diddordeb yn eitem 4 ar yr agenda.

#### 2. MATERION BRYD A ARDYSTIWDYD GAN Y PRIF WEITHREDWR NEU SWYDDOG A BENODWYD GANDDI

Dim i'w hadrodd.

#### 3. CYLLIDEB GYFALAF GYCHWYNNOL 2021/22

Cyflwynwyd adroddiad y Cyfarwyddwr Swyddogaeth (Adnoddau)/Swyddog Adran 151 sy'n cynnwys y gyllideb gyfalaf gychwynnol ar gyfer 2021/22 i'r Pwyllgor Gwaith ei ystyried.

Cyflwynodd y Cynghorydd Robin Williams, Aelod Portffolio Cyllid, yr adroddiad drwy esbonio y bydd y gyllideb gyfalaf arfaethedig gychwynnol, fel rhan o'r broses o bennu'r gyllideb ynghyd â chynigion y gyllideb refeniw ddrafft o dan yr eitem ddilynol, yn destun

ymgyngoriad ffurfiol â'r Pwyllgor Sgriwtini Corfforaethol a'r cyhoedd. Yna bydd y Pwyllgor Gwaith yn gwneud ei argymhellion terfynol ynghylch cyllideb 2021/22 i'r Cyngor Sir. Bydd cyfarfod y Cyngor Llawn ar 9 Mawrth, 2021 wedyn yn cymeradwyo'r gyllideb a lefel y Dreth Gyngor ar gyfer 2021/22.

Dyweddod yr Aelod Portffolio ei bod wedi bod yn anos llunio'r gyllideb gyfalaf eleni oherwydd diffyg cyllid sy'n golygu y bydd yn rhaid dod o hyd i arian ychwanegol er mwyn cyflawni'r prosiectau cyfalaf a argymhellir yn llawn. Cyfanswm y Cyllid Cyfalaf Cyffredinol a dderbyniwyd gan Lywodraeth Cymru ar gyfer 2021/22 (ac eithrio'r rhaglen Ysgolion ar gyfer yr 21<sup>ain</sup> Ganrif a'r Cyfrif Refeniw Tai) yn seiliedig ar ffigurau dros dro y setliad Llywodraeth Leol yw £4.321m. O'r swm yma, mae angen £4.167m i gefnogi'r rhaglen ar gyfer adnewyddu a newid asedau presennol yn unol â'r Strategaeth Gyfalaf a fabwysiadwyd gan y Cyngor. Argymhellir cynnwys pedwar prosiect cyfalaf untro yn y rhaglen gyfalaf ar gyfer 2021/22 ac mae'r rhain yn dod i gyfanswm o £1.105m sy'n fwy na'r £921k sydd ar gael. Gallai tanwariant posibl yn y gyllideb refeniw ar gyfer 2020/21 olygu y gellid ychwanegu £1m ychwanegol at y gronfa gyffredinol y gellid ei defnyddio i ariannu'r gwariant cyfalaf ychwanegol yn 2021/22. Fodd bynnag, nid oes sicrwydd o hyn ac os bydd sefyllfa'r gyllideb refeniw yn dirywio yn ystod ail hanner y flwyddyn ariannol, gall lefel y cyllid sydd ar gael fod yn llai nag £1m. O'r 4 cynllun untro a nodir yn Nhabl 4 o'r adroddiad ystyrir bod angen rhoi blaenoriaeth i'r arian cyfatebol ar gyfer prosiectau Datblygu Economaidd (£95k) a phrynu llyfrau chrome i ddisgyblion (£305k) sy'n golygu, os nad oes digon o arian wrth gefn ar gael, yna efallai y bydd yn rhaid gwario llai ar y ddau gynllun arall – gosod wyneb newydd ar ardaloedd chwarae a chynlluniau lliniaru llifogydd. Cynigir cyfanswm rhaglen gyfalaf o £36.155m ar gyfer 2021/22.

Dyweddod y Cyfarwyddwr Swyddogaeth (Adnoddau) a Swyddog Adran 151 mai un o egwyddorion allweddol y Strategaeth Gyfalaf yw y bydd cyllid cyfalaf yn cael ei ddyrannu bob blwyddyn i sicrhau y buddsoddir yn asedau presennol y Cyngor i'w diogelu ar gyfer y dyfodol; mae'r flaenoriaeth hon wedi'i chyflawni ar y cyfan drwy Grant Cyfalaf Llywodraeth Cymru a benthyca â chymorth. Mae'r ddau bennawd yma wedi aros yn weddol gyson dros nifer o flynyddoedd gyda Llywodraeth Cymru yn cefnogi prosiectau gwariant cyfalaf penodol drwy gyllid grant. Mae hyn yn golygu bod y cyllid craidd sydd ar gael at ddibenion cyfalaf wedi bod yn lleihau fesul blwyddyn gan ei gwneud yn anos ariannu unrhyw fuddsoddiad mewn asedau sy'n bodoli eisoes. Yn y gorffennol, mae'r Cyngor wedi defnyddio derbyniadau cyfalaf fel ffynhonnell cyllid cyfalaf ychwanegol; fodd bynnag, mae'r potensial ar gyfer unrhyw dderbyniadau cyfalaf sylweddol bellach yn gyfyngedig gan fod y rhan fwyaf o unrhyw asedau sy'n weddill nad ydynt wedi'u gwerthu eisoes wedi'u clustnodi i ariannu prosiectau cyfalaf presennol neu brosiectau cyfalaf yn y dyfodol e.e. Ysgolion yr 21<sup>ain</sup> Ganrif, gwelliannau hamdden a mân-ddaliadau. Yn yr un modd, mewn blynyddoedd blaenorol, mae cyllid wedi bod ar gael o gronfa wrth gefn a glustnodwyd yn benodol i ariannu prosiectau cyfalaf. Mae defnyddio'r arian hwn dros y blynyddoedd diwethaf yn golygu bod y balans wedi gostwng yn sylweddol a bydd y balans sy'n weddill yn cael ei gadw i ariannu unrhyw waith cyfalaf brys a allai godi yn ystod y flwyddyn neu i ddarparu arian cyfatebol pe bai'r cynnig o arian grant sylweddol yn dod i law yn ystod y flwyddyn sy'n gofyn am swm bach o arian cyfatebol. Felly, mae'r gyllideb gyfalaf yn cael ei chyfyngu fwyfwy, a hynny sydd wedi arwain at y cynnig i ddefnyddio tanwariant posibl o'r gyllideb refeniw ar gyfer y rhaglen gyfalaf. Nid yw hyn yn gynaliadwy yn y tymor hir a heb newid strategaeth gan Lywodraeth Cymru o ran cynyddu cyllid cyfalaf craidd, bydd yn dod yn fwyfwy anodd ariannu unrhyw eitemau newydd o wariant cyfalaf yn y dyfodol.

Holodd yr Is-gadeirydd ynghylch cynnydd cynllun Lliniaru Llifogydd Traeth Coch ac os bydd llithriant oherwydd prinder arian cyfalaf p'un ai a fydd y cynllun a'r amserlen yn cael eu hailystyried.

Dyweddod y Cyfarwyddwr Swyddogaeth (Adnoddau)/Swyddog Adran 151 fod yn rhaid gwario cyllid grant Llywodraeth Cymru (85%) ar gyfer y cynllun yn y flwyddyn ariannol nesaf; os na fydd y Cyngor yn gallu darparu'r 15% o arian cyfatebol sy'n weddill, yna bydd yn rhaid ail-negodi'r grant gyda Llywodraeth Cymru.

Dyweddod y Cynghorydd R.G.Parry, OBE, FRAgS, Aelod Portffolio Prifffyrdd, Gwastraff ac Eiddo ei fod o'r farn ei bod yn bwysig i'r cynllun fynd rhagddo o ystyried bod 85% o gyllid ar gael i hwyluso hynny; fodd bynnag, craidd y mater yw a fydd yr arian grant yn dal i fod ar gael ym mlwyddyn ariannol 2022/23 pe na bai'r Cyngor yn gallu rhoi arian cyfatebol i'r cynllun yn 2021/22.

Awgrymodd y Dirprwy Brif Weithredwr y byddai'n syniad doeth i'r Aelod Portffolio Prifffyrdd, Gwastraff ac Eiddo ysgrifennu at Weinidogion Llywodraeth Cymru i dynnu sylw at y pwysau ar y gyllideb gyfalaf a gofyn iddynt felly ystyried ariannu cynlluniau lliniaru llifogydd yn llawn yn y dyfodol. Ychwanegodd ei bod yn bwysig na ddylid colli cyllid grant yn enwedig pan fydd ar lefel o 85%.

Cytunodd y Cadeirydd fod pennu'r gyllideb gyfalaf ar gyfer 2021/22 yn her ac yn sgil hyn, cynigiodd y dylai'r Aelod Portffolio Cyllid ysgrifennu at Lywodraeth Cymru i gyflwyno sylwadau am sefyllfa'r gyllideb gyfalaf yn Ynys Môn gan na fu cynnydd yn y dyraniad cyfalaf ers nifer o flynyddoedd a'i oblygiadau i wariant cyfalaf y Cyngor yn y dyfodol. Roedd y Pwyllgor Gwaith yn cytuno y dylid cyflwyno'r sylwadau a awgrymwyd.

#### **Penderfynwyd -**

- Argymell y rhaglen gyfalaf ganlynol ar gyfer 2021/22 i'r Cyngor Llawn –**

<b>Cynlluniau 2020/21 a ddygwyd ymlaen</b>	<b>£ 3.970m</b>
<b>Adnewyddu/Newid Asedau</b>	<b>£ 4.167m</b>
<b>Prosiectau Cyfalaf Untro Newydd (Prosiectau Blaenoriaeth)</b>	<b>£ 780k</b>
<b>Prosiectau Cyfalaf Untro Newydd (yn amodol fod Cyllid ar gael)</b>	<b>£ 325k</b>
<b>Ysgolion yr 21<sup>ain</sup> Ganrif</b>	<b>£ 6.6m</b>
<b>Cyfrif Refeniw Tai</b>	<b>£20.313m</b>
<b>Cyfanswm Rhaglen Gyfalaf a Argymhellir</b>	<b>£36.155m</b>

#### **Cyllidir gan:**

<b>Grant Cyfalaf Cyffredinol</b>	<b>£ 2.163m</b>
<b>Benthyca â Chymorth Cyffredinol</b>	<b>£ 2.158m</b>
<b>Balansau Cyffredinol</b>	<b>£ 596k</b>
<b>Balansau Cyffredinol (os oes digon o arian ar gael)</b>	<b>£ 325k</b>
<b>Benthyca â Chymorth</b>	
<b>Ysgolion yr 21<sup>ain</sup> Ganrif</b>	<b>£ 2.897m</b>
<b>Benthyca heb Gymorth</b>	
<b>Ysgolion yr 21<sup>ain</sup> Ganrif</b>	<b>£ 498k</b>
<b>Arian Wrth Gefn CRT a'r Gwarged yn y Flwyddyn</b>	<b>£15.639m</b>
<b>Benthyca heb gymorth gan y CRT</b>	<b>£ 2.0m</b>

<b>Grantiau Allanol</b>	<b>£ 5.909m</b>
<b>Cyllid 2020/21 a ddygwyd ymlaen</b>	<b>£ 3.970m</b>
<b>Cyfanswm Cyllid Cyfalaf 2021/22</b>	<b>£36.155m</b>

- **Nodi'r gofynion cyllido posibl yn y dyfodol ar gyfer 2022/23 ymlaen fel y nodir yn Atodiad 1, Tabl 3 a pharagraff 5.3 o'r adroddiad.**
- **Yn sgil y pwysau ar y gyllideb gyfalaf, fod Aelod Portffolio Prifffyrdd, Gwastraff ac Eiddo yn cyflwyno sylwadau drwy lythyr at Weinidog Llywodraeth Cymru dros yr Amgylchedd, Ynni a Materion Gwledig yn awgrymu bod cynlluniau atal/lliniaru llifogydd awdurdodau lleol yn cael eu hariannu 100% gan grant Llywodraeth Cymru ar gyfer y dyfodol, a**
- **Bod Aelod Portffolio Cyllid yn cyflwyno sylwadau drwy lythyr at Weinidog Cyllid Llywodraeth Cymru i dynnu sylw at y pwysau ar y gyllideb gyfalaf yn Ynys Môn oherwydd y diffyg cynnydd yn y dyraniad cyfalaf cyffredinol dros nifer o flynyddoedd a'r cyfyngiadau y mae hyn yn debygol o'u gosod ar weithgareddau cyfalaf a buddsoddiadau'r Cyngor yn y dyfodol.**

#### **4. CYLLIDEB REFENIW DDRAFFT 2021/22**

Cyflwynwyd adroddiad y Cyfarwyddwr Swyddogaeth (Adnoddau)/Swyddog Adran 151 a oedd yn cynnwys y Gyllideb Refeniw ddrafft ar gyfer 2021/22 i'r Pwyllgor Gwaith ei ystyried.

Dywedodd y Cynghorydd Robin Williams, Aelod Portffolio Cyllid, mai £142.146m oedd y Gyllideb Refeniw ar gyfer 2020/21 h.y. y flwyddyn ariannol gyfredol. Ar gyfer 2021/22 mae nifer o newidiadau hysbys yr ymrwymwyd iddynt yn debygol o effeithio ar y gyllideb. Manylir ar y rhain yn adran 3 o'r adroddiad ysgrifenedig ac maent yn cynnwys amrywiadau yn niferoedd disgyblion, taliadau i Gais Twf Gogledd Cymru, costau Pensiwn hanesyddol a buddsoddi mewn technoleg gwybodaeth. Y newid mwyaf arwyddocaol yw cost gynyddol y Contract Casglu Sbwriel a Glanhau Strydoedd newydd gyda Biffa, sydd £909k yn uwch na'r gyllideb gyfredol. Gan ystyried yr holl addasiadau a thymhriaethau fel y'u nodir yn Adran 3, cyfanswm y gyllideb ddigyfnewid ar gyfer 2021/22 yw £147.076m, cynnydd o £4.930m ar gyllideb derfynol 2020/21. Bydd setliad dros dro uwch gan Lywodraeth Cymru yn talu £3.821m o'r costau uwch gan adael diffyg cyllid o tua £1m i'w ariannu drwy Dreth y Cyngor.

Byddai'r gyllideb ddigyfnewid o £147.076m yn caniatáu i'r Cyngor gynnal ei wasanaethau presennol; fodd bynnag, mae'r Cyngor yn wynebu pwysau cyllidebol newydd a gofynion newydd am wasanaethau na chaniatwyd ar eu cyfer yn y gyllideb. Mae'r pwysau a'r gofynion hyn - rhai ohonynt mewn gwasanaethau sydd wedi dioddef gostyngiadau yn ystod y cyfnod o lymder - wedi dod yn fwy amlwg wrth i'r Cyngor ymateb i bandemig Covid. Manylir ar y meysydd blaenoriaeth y nodwyd bod angen cyllid ychwanegol arnynt yn adran 10.6 o'r adroddiad ac maent yn cynnwys adfer y rhaglen hyfforddeion broffesiynol; cryfhau capasiti Gwarchod y Cyhoedd; Cynhwysiant Addysg; Cymorth TG i ysgolion; rheoli twristiaeth a newid yn yr hinsawdd. Ar ôl ystyried y gyllideb ddigyfnewid ac yng ngoleuni'r ffaith bod angen cynnydd o 2.55% yn bennaf i ariannu'r cynnydd yng nghost y contract casglu sbwriel newydd, ystyriwyd cynnydd ychwanegol o 1.2% yn y Dreth Gyngor fel ffordd o ariannu'r pwysau a'r gofynion ychwanegol ar y gyllideb. Byddai cynnydd ychwanegol o 1.2% yn uwch na'r lefel sy'n ofynnol i ariannu'r gyllideb ddigyfnewid (tabl 4 ym mharagraff 9.2) yn cynhyrchu £494k ychwanegol o gyllid. Cynigir felly y dylid cynyddu lefel y Dreth Gyngor o 3.75% sy'n cyfateb i gynnydd wythnosol o 94c ar gyfer eiddo Band D.

Tynnodd y Cyfarwyddwr Swyddogaeth (Adnoddau)/Swyddog Adran 151 sylw at y risgiau canlynol i'r gyllideb –

- Ansicrwydd o ran y dyfarniadau cyflog posibl ar gyfer y ddau brif grŵp o weithwyr llywodraeth leol – athrawon a staff NJC. Er bod cyhoeddiad wedi'i wneud ym mis Tachwedd, 2020 y byddai cyflogau holl weithwyr y sector cyhoeddus (ac eithrio'r GIG) sy'n ennill dros £24,000 yn cael ei rewi, ac y byddai'r dyfarniad tâl i'r rhai sy'n ennill llai na £24,000 o leiaf yn £250, nid Llywodraeth y DU sy'n pennu'r dyfarniad cyflog ar gyfer gweithwyr llywodraeth leol, ond y corff sy'n cynrychioli cyflogwyr llywodraeth leol. Yn ogystal â hyn, mae pennu'r dyfarniad cyflog athrawon blynyddol wedi'i ddatganoli i Lywodraeth Cymru. Caniatwyd cynnydd o 1% yn y gyllideb ddigyfnewid ar gyfer chwyddiant cyflog ar gyfer cyflogau athrawon ac ar gyfer cyflogau staff NJC.
- Mae darpariaeth wedi'i chynnwys yn y gyllideb ar gyfer Cynllun Gostyngiadau'r Dreth Gyngor sy'n cyfateb i'r cynnydd arfaethedig o 3.75% yn y Dreth Gyngor. Fodd bynnag, nid oes arian ar gael yn y gyllideb pe bai nifer yr hawlwyd yn cynyddu'n sylweddol. Mae Llywodraeth Cymru wedi bod yn darparu cymorth ychwanegol eleni i dalu cost y cynnydd yn y galw ar y cynllun oherwydd effaith Covid 19 a deallir y bydd y cymorth hwn ar gael y flwyddyn nesaf os bydd ceisiadau o dan y cynllun yn cynyddu'n sylweddol.
- Nid oedd darpariaeth wedi'i gwneud yn y gyllideb ar gyfer costau sy'n gysylltiedig â Covid. Hyd yma, mae Llywodraeth Cymru wedi talu'r costau uwch a wynebwr gan y Cyngor o ganlyniad i'r pandemig yn ogystal â darparu ad-daliad am golli incwm. Bydd y trefniant hwn yn parhau tan ddiwedd y flwyddyn ariannol gyfredol. Wrth nodi y bydd yn cyhoeddi'r trefniadau ar gyfer y flwyddyn ariannol nesaf, mae Llywodraeth Cymru wedi'i gwneud yn glir y bydd cyllid ychwanegol ar gael i'r Cyngor ond ni wyddom ar ba lefel y bydd y cyllid hwnnw. Rhagwelir y bydd Llywodraeth Cymru yn ariannu costau ychwanegol parhaus a ysgwyddir o ganlyniad i Covid ac y bydd yn gwneud iawn am unrhyw incwm a gollir gan y Cyngor yn sgil gorfod cau ei gyfleusterau o fis Ebrill ymlaen.

Wrth ddiolch i'r Gwasanaeth Cyllid am yr wybodaeth a'r adroddiad a luniwyd o fewn amserlen dynn ers cyhoeddi'r setliad Llywodraeth Leol dros dro ar 22 Rhagfyr 2020, roedd y Pwyllgor Gwaith yn croesawu'r ffaith bod rôl allweddol Diogelu'r Cyhoedd yn y pandemig wedi'i chydabod yn y gyllideb ddrafft yn ogystal â'r buddsoddiad mewn rhaglen hyfforddeion i ddatblygu'r genhedlaeth nesaf o weithwyr proffesiynol ym maes llywodraeth leol. Mewn ymateb i gais gan y Cyngorydd Carwyn Jones, darparodd y Cyfarwyddwr Swyddogaeth (Adnoddau)/Swyddog Adran 151 grynodedb o Gynllun Gostyngiadau'r Dreth Gyngor o ran sut mae'r cynllun yn gweithio, ar gyfer pwy y mae'r cynllun a'r broses ymgeisio.

#### **Penderfynwyd cymeradwyo'r canlynol –**

- **Yr addasiadau i'r Gyllideb sydd wedi'u cynnwys yn y Gyllideb Ddigyfnewid fel y nodir ym Mharagraffau 4 i 7 o'r adroddiad.**
- **Y gyllideb ddigyfnewid ar gyfer 2021/22 o £147.076m. Dylai hon fod yn sail i gyllideb refeniw 2021/22.**
- **Cynnydd arfaethedig o £3.75% yn y Dreth Gyngor ar gyfer 2021/22 a fydd yn destun ymgynghoriad cyhoeddus.**
- **Diwygiadau arfaethedig ychwanegol i'r gyllideb fel y nodir yn Nhabl 5 yr adroddiad.**
- **Cyllideb arfaethedig gychwynnol ar gyfer 2021/22 o £147.531m**
- **Y dylai'r Pwyllgor Gwaith geisio barn y cyhoedd ar y gyllideb arfaethedig a'r cynnydd yn y Dreth Gyngor ar gyfer 2021/22.**

## 5. CAU ALLAN Y WASG A'R CYHOEDD

Penderfynwyd –

“O dan Adran 100 (A) (4) Deddf Llywodraeth Leol 1972, cau allan y wasg a'r cyhoedd o'r cyfarfod yn ystod y drafodaeth ar yr eitem ganlynol ar y sail y gallai olygu datgelu gwybodaeth eithriadig fel y'i diffinnir yn Atodlen 12A y Ddeddf a'r Prawf Budd y Cyhoedd fel y cyflwynwyd nhw.

## 6. ACHOS BUSNES LLAWN – ADEILAD YSGOL NEWYDD YN LLE YSGOL CORN HIR

Cyflwynwyd adroddiad y Cyfarwyddwr Addysg, Sgiliau a Phobl Ifanc sy'n cynnwys yr Achos Busnes Llawn ar gyfer adeilad ysgol newydd yn lle Ysgol Corn Hir yn Llangefni i'w ystyried gan y Pwyllgor Gwaith.

*Ar ôl datgan diddordeb personol sy'n rhagfarnu yn y mater hwn, ymneilltuodd y Cynghorydd Richard Dew o'r cyfarfod yn ystod y drafodaeth a'r penderfyniad arno.*

Cyflwynodd y Cynghorydd R. Meirion Jones, Aelod Portffolio Addysg, Llyfrgelloedd Diwylliant ac Ieuencid, yr adroddiad drwy ddweud bod yr Achos Busnes Llawn wedi cael ei baratoi i sicrhau cyllid cyfalaf ar gyfer adeilad ysgol newydd ar gyfer Ysgol Corn Hir o dan Raglen Band A Ysgolion yr 21ain Ganrif. Os bydd yn llwyddiannus, bydd yn golygu bod Llywodraeth Cymru yn ariannu 50% o gostau'r cynnig gyda gweddill y costau i'w hariannu drwy adnoddau cyfalaf y Cyngor.

Atgoffodd y Cyfarwyddwr Addysg, Sgiliau a Phobl Ifanc y pwyllgor o gefndir y cynnig gan ddweud bod holl elfennau'r Achos Busnes Llawn yn seiliedig ar yr opsiwn newydd a ffefrir gan y Cyngor ar ôl cynnal ymgynghoriad statudol rhwng 6 Chwefror a 20 Mawrth 2020 a'i gymeradwyo gan y Pwyllgor Gwaith ar 17 Rhagfyr, 2020 sef adeiladu ysgol newydd ar gyfer Ysgol Corn Hir a gadael Ysgol Bodffordd fel y mae. Lluniwyd yr achos Busnes yn unol â chanllawiau Achos Busnes Ysgolion yr 21<sup>ain</sup> Ganrif yn seiliedig ar yr Achos Busnes – Model Pum Achos ac mae'n darparu gwybodaeth mewn perthynas â phob cam o ddatblygiad y cynnig mewn perthynas â'r achos strategol, yr achos economaidd, yr achos masnachol, yr achos rheoli a'r achos ariannol dros y cynnig.

Diolchodd y Pwyllgor Gwaith i'r Gwasanaeth Dysgu a staff y Gwasanaeth Trawsnewid am eu gwaith ar yr Achos Busnes Llawn.

Penderfynwyd –

- **Cymeradwyo'r Achos Busnes Llawn ar gyfer adeilad ysgol newydd yn lle Ysgol Corn Hir**
- **Cymeradwyo cyflwyno'r Achos Busnes Llawn i Lywodraeth Cymru**
- **Cymeradwyo bod derbyniadau cyfalaf yn cael eu neilltuo ar gyfer codi adeilad newydd yr ysgol yn lle Ysgol Corn Hir, yn amodol ar unrhyw broblemau sy'n codi wrth werthu'r safle.**
- **Dirprwyo awdurdod i'r Cyfarwyddwr Addysg, Sgiliau a Phobl Ifanc mewn ymgynghoriad â'r Cyfarwyddwr Swyddogaeth (Adnoddau)/Swyddog Adran 151 a Chyfarwyddwr Swyddogaeth (Busnes y Cyngor)/Swyddog Monitro i ddiwygio'r Achos Busnes Llawn os oes angen – os nad yw'r newidiadau'n arwain at newidiadau sylweddol (o ran polisi, egwyddorion, cyfraniad ariannol, risgiau a niwed i drydydd partion).**

**Cynghorydd Llinos Medi  
Cadeirydd**

DRAFT